

Forfatter: Blicher, Steen Steensen

Titel: Udrag fra E Bindstouw (DK) (paralleltekst med Rigsmålgengivelse)

Citation: Blicher, Steen Steensen: "Noveller", i Blicher, Steen Steensen: *Noveller*, udg. af Esther Kielberg ; Henrik Ljungberg , Det Danske Sprog- og Litteraturselskab, Borgen, 1991, s. 256. Onlineudgave fra Arkiv for Dansk Litteratur: <https://tekster.kb.dk/catalog/adl-texts-blic03val-shoot-idm140515387307344/facsimile.pdf> (tilgået 07. december 2021)

Anvendt udgave: Noveller

Ophavsret Materialet er dedikeret til public domain. Du kan kopiere, ændre, distribuere og fremføre værket, også til kommercielle formål, uden at bede om tilladelse. Husk dog altid at kreditere ophavsmanden.

[Læs CC0-erklæringen.](#)

Degaang vi saa kam te Hamborre igjen, saa vil vi et længer væ ve Fransmannen. Da vi saa Faawal te ham, da græd Prins Ekmøll som et Baan, faa han vil et haa wor aa mæ wos. «Faawal!» sø vi. «Adi!» sø di, «adi!» Ræv aa Har!» «Kys wos hial!» sø vi. Saa begynt di igjen mæ dje Piivnak. «Ja piiv I no i wo . . .» sø vi, aa saa rej vi te Baanhøwd. Die kam Kosakkeren om wos. Di vil prik ætte wos mæ dje Pigkjepper. Den føest, A soe, tint A war en Kræmer; men da han kam næter, ku A wai sie te de sku væ en Krigskaal. «Do er en sue Kaal te aa ri!» sø A te ham: «A trower missin Do sidder oweno di Madpues.» «Dowre!» sø han. «Ve Do ha Dowr?» sø A, «ja dessom Lægtmanten soe, hudden Do sedder mæ din Knæer, saa vil han nok gi Dæ Dowr; ka hæse Do fik Tewand aasse.» Men saa stak han mæ i mi hower Laar. «Do æ sue nære!» sø A, aa saa hog A hans Kjep mit øwer, aa ham sjæl bag etter. «Do ku ha woer fræ mæ!» sø A. Die war aasse en fransk Genneraal falle mæ wos. Di kalt ham Lallemand. De war en Wowhals. Han haad en bette rø Lue po, den swinged han aalti mæj, aa saa rowt han lissaa hæwt som han kunn: «Brave Danno! A æ laang! A æ laang!» men de war ett sann, faa han wa kun en bette stumpet Kaal; men modde wa han.

Sien drøw vi te en Bøj, di kalt Sestej; dia wa saa manne Finner, te den jer: ku et spot faa den aan; men vi ragt dem indda tesii, aa kam walhollen in te Rensborre. Po Vejen kam der en Fransmand rennen, aa sprang op po Højsten bag ve mæ: «Væk Per Mission!» sø han. «A hedder ett Pej, A hedder Jens,» sø A, «ik heller vil A go væk for Dæ; men ve Do væ skekkele, saa mo Do ri mæj.» Saa vil han hat Akkevit. «Ve do ha Brænviin?» sø A, «de ka Do fo» aa saa ga A ham ow mi Flask. Da han had drokken, begynt han aasse aa snak om mi loring Piivror. «Hwissommenti Do ett holler Flav» sø A, «saa skal A kyll Dæ nier ow Højsten.» Men saa ba han om en mild Pardon, aa siin bløw han rolle.

De wa de siist Slaw. A war i; aa degaang A sku te aa sedd ow Højsten, haad A most mi Maandbed te mi Piiv, aa A haar aalle sit et siin.»